



## † R. P. Timotheus Power (1841-1933)

*(Prov. Hibern.)*

Die 13 Novembris 1933, festo S. Stanislai, sui annui patroni, et ipso die anniversario suae professionis, 70 ante annis factae, obiit confrater venerabilis et optime meritis huius Provinciae, R. P. Timotheus Power. Vita tam longa ac tam bene et sancte in Congregatione peracta certe nonnulla habet quae in Analectis mentionem mereantur.

Timotheus Power in paroechia Ballybricken, dioecesis Cassiliensis, natus est anno 1841. Puer ipsos Congregationis in Hibernia signiferos et fundatores, sodales Provinciarum Angliae, Belgii, Hollandiae, quorum nomina apud nos in benedictione adhuc sunt, vidit audivitque. Ipse, annos natus 21, ad novitiatum in domo Bishop Eton in Anglia admissus est. Novitiatu rite peracto die 13 Novembris a. 1863 vota in Congregatione nostra nuncupavit. Deo gratias et Mariae, quod eodem ipso die, 70 post annis, Domino redeunte et vocante, fidelis inventus est!

Die 8 Octobris a. 1869 in domo Wittemiensi ad sacros ordines promotus et paulo post ad Angliam regressus, per 10 fere annos sacris missionibus totis viribus se dedit. Sed Deus sua ineffabili providentia decreverat ut vita religiosa R. P. Power non in externo verbi ministerio, sed in apostolatu occulto orationis et patientiae magna ex parte esset transigenda. Anno 1879 sectione chirurgica crus abscindi oportuit — crucem pro crure Deo ei reddente — et ab illo tempore usque ad mortem 54 post annis obitum dolorum nunquam omnino expers fuit. Chirurgus per errorem partem filii ferrei in carne viva reliquit, quod quidem causa fuit continui fere doloris. Nihilominus hic miles Christi impiger doloribus corporis et mentis lassitudini nequaquam cessit. Missionibus quidem obeundis fuit impar, sed exercitationibus spiritualibus sive sacerdotum sive religiosorum sive monialium usque ad extremam senectutem nunquam praeesse destitit.

Domi etiam commorans multa fecit pro animabus tum confratrum, tum externorum qui ecclesias nostras frequentabant. Pluries fuit Superior, primum a. 1880 domus Bishop Eton Rector creatus, deinde domus Clapham a. 1884. Per hoc triennium Consultor quoque Provincialis fuit. Anno 1887 Praefectus studentium in domo Teignmouth factus, per sex annos alumnos Provinciae Anglicae-Hibernicae moderatus est. In studentatu eo tempore fuit Rm̄us Pater Rector Maior, qui per duos annos R. P. Power Praefectum habuit. Persaepe in annorum decursu Sua Paternitas maximam benevolentiam suam ac reverentiam erga antiquum Praefectum testatus est. Inter epistolas gratulatorias quas occasione completi septuagesimi sui in Congregatione anni, iam moribundus, accepit, nulla fuit ei gratior ea quae gratulationes ac benedictionem Rm̄i Patris Generalis attulit.

Nova Provincia Hibernica a. 1898 erecta, R. P. Power ibi novem per annos munere Consultoris Provincialis fungebatur. Sex etiam per annos Rector domus studendatus Esker fuit. Domi ut plurimum commorans, apostolatam fecundum in nostris ecclesiis exercebat. Ad confessiones audiendas semper paratus, pluries in die ad primum signum campanulae confessionale adibat. Quae quidem alacritas, ut in omnibus est signum haud mediocris virtutis, ita in illo, corpus tam mancum ac debile habentis mortificationis et obedientiae spiritum indicabat. Congregationi maximo amore deditus, observantiae regularis tenacissimus fuit. Si quid contra eam delictum vel in observantia relaxatum videbat audiebatve, vehementer dolebat, quin etiam, sed nunquam sine caritate, aperte improbat. Semper a Deo expetebat ut Congregatio magis magisque diffunderetur et maiora pro Dei gloria et animarum salute perficeret.

Erga SS. Sacramentum et augustum Sacrificium Missae peculiarem devotionem fovebat. In summa etiam senectute nonaginta et amplius anno-



R. P. Timotheus Power (cum baculo)  
et R. P. Patritius Sampson († 1929)  
in adamantino professionis iubilaeo  
13 Nov. 1923 (*Analecta* III, 59).

rum quotidie s. Sacrificium magna cum devotione offerebat, paucis tantum ante mortem mensibus exceptis. Vespere post actus communes ad sacellum domesticum se, quamvis aegre, conferebat ibique coram Sanctissimo multas per horas pro peccatoribus et felici apostolicorum laborum successu orabat. Quoties missionarii nostrae Provinciae, miram et inopinatam alicuius peccatoris conversionem cernentes, de venerabili confratre domi coram Sanctissimo orante cogitaverunt! Soli Deo notum est quot et quantas gratias pro Provincia nostra et tota Congregatione eius continua oratio et indevicta patientia obtinuerit.

Appropinquante septuagesimo die anniversario professionis vires eius paulatim deficere videbantur. Cum medicus vocatus mortem non longe abesse diceret, s. Viaticum et extremam unctionem plene sui composuisset. Mane, die festo S. Stanislai, mors imminere visa est. Veteranum Alfonsiani Instituti militem sanctus Societatis Iesu tiro ad coronam vocabat! In illa ultima hora saepissime imagines Christi Crucifixi et dulcis eius Matris de Perpetuo Succursu osculabatur. In vita amores eius soli fuerant, moriens fidelis inventus est. Faxit Deus ut et nos exemplum eius sequamur, idem praemium consecuturi! R. I. P.